


Skina di Ruthy


- Etty Toppenberg -

E artista mas stima di pueblo

Skirbi pa Ruthy "Lady Ruth" Vrieswijk-Bergen

Mi a tende di dje y mi a lese ariba face book. Señora Ingrid Werleman a saca hopi bunita potret y post e informacion ariba facebook. Te cu porfin dos siman pasa mi a bay pa scuchele y wak pa mi mes, con dushi e ambiente ta dilanti Djiespies Place, riba Diabierna atardecer, ora cu solo ta bahando drenta noch bay culmina cu e canticanan di mas dushi cu mayoria di nos conose. Mi no sa si e grupo di musiconan aki tin un number, mi no sa si ta tur ta profeshonal of amateur, pero un cos si, tur tin curason, amor y passion pa musica, tocando hunto cu e artista profeshonal cu curason, mas y mas stima den pueblo Ety Toppenberg. Ta ken no conose? Ta ken no a yega di tendele toca guitarra y canta? Mi por a tende tambe, cu cada bez e publico cu ta bay scucha nan toca y canta ta birando mas y mas grandi. Y ta mas y mas grandi tambe e amor pa e talento incansabel di Ety. E ta cuminsa toca y canta for di ora solo baha te ora luna ya ta hopi haltó na shelo dorna di streanan bunita cu ta inspira e streanan bunita cu ta canta hunto cu Ety of cu ta baila riba e dushi ritmonan varia y alegre cu Ety y su grupo ta produci ey mes, dilanti Djiespies Place, riba e plaza bunita dorna na klinkers y un bunita fonteín di awa. Ki bunita pa sinti y wak tanto dushi energia alegre hunto asina! Un sorto di happy hour pero uno bastante largo. No di un ora, pero di 3 pa 4 ora non stop di canto y musica cu ta alegre e curason y alma sigur! Nos troubadour rubiano, esun cu ta inspira letranen e momento ey mes, pone sonrisa riba tur e caranan, e di dos biaha, e di dos Diabierna cu Lady Ruth a bay, el a keda encanta y impresiona atrobe, por a observa con hopi di nos dushi hendenan local ta move y baila den parcha, den grupo of nan so cu nan so, gozando y disfrutando di un tremendo show y dunando nan show nan mes! E biaha aki, Ety bisti na preto pa despues di un rato cambia su pechi colorido pa un sombre manera esun di "De Gelaarsde kat" cu su pluma na banda patras. Ety a baha den publico y baila un crenchi cu varios di su dushi hendenan. Ety ta canta den 6 of ta 7 idioma cu e mesun passion den cada expresion, hunga cu wega di palabra y pone hende, hari sinti full relaha. Cu gran aplauso di e publico grandi, mas grandi cada biaha. Biaha pasa ora Ety a canta un di su bunita cancionnan pa su barío stima Compa Nashi, Lady Ruth kier a dal e grito di alegria: "Dakota tur dia" pero no tabatin espacio, pasobra ta trai otro e canticanan tabata worde toca y canta, cu apenas un paar di seconde tin biaha pa sea baha of subi e tono musical. Lady Ruth por a observa y nota cu ta tur sorto di hende ta forma e publico pa e gran y dushi concierto publico aki den aire liber, tur hendenan cu ta gusta musica, hendenan cu ta gusta baila, hendenan cu ta gusta canta. E team dinamico y potente di Djiespies Place ta duna nan servicio excelente, ta hopi atento y hopi amabel, mientras Djiespie mes y su distinguida señoraesposa ta sinta dilanti e stoepi, cu ta e pida stage, riba cual e grupo di musiconan ta para cu algun para abao na banda. Sempel, nada complica. Si pa hopi e segundo hymno di Aruba ta e cantica Abo so di Padu Lampe, segun e gran artista rubiano aki e segundo hymno

ta e cancion ranchera El rey. Ety ta canta e cancionan di mas bunita cu bo no ta tende na radio. Ety ta canta cu su alma. Ety ta canta, canta y sigui canta cu amor y passion pa inspira e curasonnan eyfor cu mester di alegria!!!!Tur sorto di cancion!!!

Na final di e concierto unico den su estilo y super dushi aki, hendenan ta bosha pa bay saluda e gran yiu di tera aki, cu a cuminsa cu algo cu no por worde iguala. Cu Dios sigui drama su bendicion ariba e musica guitarista cantante aki cu ta duna hopi hende e oportunidad di goza tur Diabierna anochi, topa otro, combersa, canta y baila, wapa of huppelen, pero Ety no ta gusta bachata, sina ta, wak pa bo baila bo chachacha of son montuno of bolero bon!!!Y corda bay cu un curason yena di gradicimento pa e dushi momento aki, un momento special na unda tur hende ta bon bini, na unda e union ta den cada melodia y den cada cancion. God bless!!!

